

# **Badische Landesbibliothek Karlsruhe**

**Digitale Sammlung der Badischen Landesbibliothek Karlsruhe**

**Meditationum evangelicarum pars tertia, hoc est:  
Tractatio evangeliorum tam dominicalium, quam  
festivalium, ad recte se sub variis tentationum generibus  
gerendum, disposita**

**Creide, Hartmann**

**Francofurti ad Moenum, 1682**

De secundo

[urn:nbn:de:bsz:31-126133](https://nbn-resolving.org/urn:nbn:de:bsz:31-126133)

## De Secundo.

**S**equitur *Medela*, quæ fuit  
I. *Ex Dei collectione*. Sic enim Deus  
dilexit mundum. Hæc dilectio est

1. *Cordialis*, quod indicat vocula *Sic*,  
quæ respicit donum è dilectione promanans,  
quod est Filius Dei, cum Christus inquit:  
Sic Deus dilexit mundum, Quomodo dilexit?  
Ut Filium suum unigenitum daret.  
Verè hæc dilectio cordialis est, de quâ totus  
mundus gloriari potest:

Cor flexit ad me patrium  
Perquam profectò serium  
Nec optimo pepercit.

Non verò tantum Deus Filium suum nobis  
dedit, sed & in ignominiosam & acerbissimam  
crucis mortem pro nobis tradidit, ubi quasi  
vermis fuit, & non homo: opprobrium  
hominum & abjectio plebis, & clamavit:  
Deus meus, Deus meus, quare me dereliquisti,  
Psal. 22. v. 1. 7. Quis hinc non exclamaret?  
Diligit populos! Deut. 33. v. 3. Quid est  
homo, quod memor es ejus, & filius hominis,  
quoniam visitas eum? Psal. 8. v. 5. hinc verè  
commota sunt viscera Dei, ut miserans  
miseretur sit nostrum, Jerem. 31. v. 20.

2. *Universalis*. Id vox mundi innuit,  
quando Christus ait: *Mundum* Deus dilexit.  
Per mundum Reformati solos Electos  
intelligi volunt, sed ad eò perperam, ut  
vel ipse Crocius vi veritatis adactus  
diversum confessus sit, inquit: *Christus hic  
per mundum non intelligit Electos tantum,  
prout jam à mundo separati sunt: sed totum  
genus humanum universè sumtum, prout  
natura in peccato jacet.* Extendit se igitur  
hæc dilectio

super totum mundum, qui ex credentibus  
& incredulis consistit.

3. *Realis*. Dedit *Filium suum unigenitum*.  
Perpendite Vos mei! quid animi haberet  
probus aliquis Pater, si filium suum, eumque  
unigenitum, pro peregrino, & quidem  
nefario malefico in mortem tradere  
compellaretur, non credo quemquam eò  
adactum iri. Hoc verò Deus ex summo amore  
& infinitâ misericordia fecit, & quidem  
cum adhuc peccatores & inimici essemus,  
1. Joh. 4. v. 9. 10.

Hinc igitur efficax solatium capere potes,  
mi Christiane! Quia Deus mundum dilexit,  
non igitur est, quod dubites de dilectione  
divinâ, sed cum Paulo potius dicere vales:  
Si Deus proprio Filio suo non pepercit,  
sed pro me tradidit illum: quomodo etiam  
non cum illo donaret mihi omnia? Certus  
sum, quia neque mors, neque vita, neque  
Angeli &c. Rom. 8. v. 32. 38. 39.

II. *Ex mundi per Christum salvatione*,  
sicut Christus in hoc ipsum in mundum  
venisse, profitetur. Angelus quoque  
Gabriel conceptionem ejus annuncians ait,  
quod nomen ejus Jesus vocari debeat,  
quoniam salvum facturus sit populum suum  
à peccatis eorum, Matth. 1. v. 21.

In Concilio Hierosolymitano ait Petrus:  
Per gratiam Domini Jesu Christi credimus  
salvari, sicut & Patres V. Test. Act. 15. v. 11.  
Ubi Christus fundamentum salutis tam  
salvatorum in V. T. quàm salvandorum  
in N. T. constituitur, qui est benedictum  
illud mulieris Semen, quod contrivit  
caput serpentis, Gen. 3. v. 15. quem &  
multi Patriarchæ, Reges & Prophetæ,  
quamvis non per speciem, sed per fidem  
m m m 3 vide-

viderunt, sicut id de Abrahamo Christus asserit, Joh. 8. v. 56.

Sic & in N. T. fundamentum ille manet. Non enim in alio aliquo salus, Act. 4. v. 12. Et fundamentum aliud nemo potest ponere, præter id, quod positum est, quod est Jesus Christus, 1. Cor. 3. v. 11.

Hoc fundamentum & petram salutis nostræ, Diabolus destructum it, quando animis tentatis tela sua ignita immitit, quod propter peccatorum multitudinem sibi ad iudicium infernale tradendi sint, quo ipso nihil nisi desperationem eorum efficere tentat. Veruntamen, licet Christus à Patre suo cælesti iudex vivorum & mortuorum constitutus sit: non tamen in tempore gratiæ dum hodiè dicitur, morti nos traditurus est: sed quia est resurrectio multorum in Israel, Luc. 2. v. 34. omnes laborantes & oneratos peccatores refecturus est, Matth. 11. v. 23. Potes itaque Satanæ tentanti respondere: Quis accusabit adversus me? Deus est qui justificat, Rom. 8. v. 33.

III. *Ex privilegii exemptionis à iudicio, fruitione.* Hinc Christus: Qui in Filium credit, non iudicatur.

Hoc ut intelligas, sciendum est, divinum iudicium esse, in quo juxta rigorem legis tota natura & vita hominis inquiritur, utrum in omnibus Dei mandatis ambulaverit sincerè & sine hypocrisis. Quia verò nemo justificaretur in conspectu ejus, si intrare nobiscum in iudicium vellet, Psalm. 143. v. 3. Filium suum, qui quæ non rapuit exsolvit, Psalm. 69. v. 5. in hoc iudicium citavit, eumque ut vadem pro nobis, qui solvendo non fuimus, ad solutionem adstrinxit, iudicium suum in eo exequendo, & hoc

ipso Christus nos redemit de maledicto legis, factus pro nobis maledictum, Galat. 3. v. 13.

Quicumque igitur in Christum credunt, privilegio gaudent, quod in rigoroso hoc legis iudicio comparere non teneantur.

Deinde quoque Pater Filio potestatem dedit iudicium facere, Joh. 5. v. 27. hic verò pro tribunali legis thronum gratiæ constituit, Hebr. 4. v. 16. ad quem appellare possumus, quando lex nos citatura & damnatura est: siquidem ab hoc iudicio exempti & immunes sumus, ex hac ipsa ratione. quia Christus illi pro membris suis satisfecit. Ita nemo, qui in Filium Dei credit, iudicatur, quem Deus misit factum sub lege, ut nos, qui sub lege eramus, redimeret, ut adoptionem filiorum acciperemus, Gal. 4. v. 5.

Licet igitur in Christum credentes, dic novissimo in iudicium venturi sint, attamen non venient in iudicium condemnationis: sed ut absoluti in eo à damnatione, ad vitam æternam vocentur, & vocem Christi audiant: Venite benedicti Patris mei, hæreditariò accipite Regnum, quod paratum vobis est, ab exordio mundi, Matth. 25. v. 34.

### De Tertio.

**R**estat *Cautela*, quæ tribus absolvitur Regulis, ut sunt

I. *In Christum crede.* In prælecto Evangelio audimus, Deum Filium suum ideò mundo dedisse, ut omnis qui credit in eum non pereat, sed habeat vitam æternam. Ex quo hæc adhortatio fluit: *Nisi damnari vis, crede in Christum.*

Id ipsum